

REGLUGERÐ

um greiðslumark sauðfjár á lögbýlum 2015.

1. gr.

Beingreiðslur og greiðslumark lögbýla.

Heildarfjárhæð beingreiðslna árið 2015 er 2.535 m.kr. Heildargreiðslumark sauðfjár á lögbýlum 1. janúar 2015 er 368.457 ærgildi. Beingreiðslur til lögbýla taka breytingum í samræmi við ákvæði IX. kafla laga nr. 99/1993 um framleiðslu, verðlagningu og sölu á búvörum með síðari breytingum (búvörulög).

2. gr.

Handhafar beingreiðslna.

Handhafi beingreiðslna er ábúandi lögbýlis.

Matvælastofnun heldur skrá yfir rétthafa greiðslumarks lögbýla og handhafa beingreiðslna samkvæmt því. Á hverju lögbýli skal aðeins einn framleiðandi vera skráður handhafi. Þó er heimilt, þegar um fleiri sjálfstæða rekstraraðila, er að ræða sem standa að búinu, að skrá þá sérstaklega. Sjálfstæður rekstraraðili telst sá einn sem hefur sjálfstætt virðisaukaskattsuppgjör.

Réttur til beingreiðslna flyst milli aðila innan lögbýlis við ábúendaskipti og við breytingu skráningar ef um hjón eða sambýlisfólk er að ræða.

Handhafar beingreiðslna skulu láta Matvælastofnun í té upplýsingar um sérstakan reikning í banka eða öðrum viðskiptastofnunum, sem greiðslur skulu lagðar inn á.

3. gr.

Aðilaskipti.

Aðilaskipti að greiðslumarki skulu taka gildi 1. janúar ár hvert og beingreiðslur greiðast nýjum handhafa frá sama tíma. Tilkynna skal Matvælastofnun aðilaskipti að greiðslumarki á eyðublöðum sem Matvælastofnun lætur í té fyrir 15. janúar ár hvert vegna beingreiðslna ársins.

Með tilkynningu um aðilaskipti að greiðslumarki sem bundið er við lögbýli, sbr. 1. og 2. mgr. 38. gr. búvörulaga, skal fylgja staðfesting um eignarhald að lögbýli og samþykki ábúanda, sameigenda og veðhafa í lögbýlinu.

Með tilkynningu um aðilaskipti að sérskráðu greiðslumarki í eigu ábúanda eða leiguliða við lok ábúðar eða leigu, sbr. 4. mgr. 38. gr. búvörulaga, skal fylgja staðfesting á eignarhaldi lögbýlis og því að eiganda jarðar hafi verið boðinn forkaupsréttur.

Matvælastofnun skal staðfesta aðilaskipti að greiðslumarki með áritun á tilkynningu og öðlast þau þá gildi frá og með 1. janúar, sbr. 2. mgr. 38. gr. búvörulaga. Matvælastofnun skal tilkynna báðum aðilum bréflaga um staðfestingu aðilaskipta.

4. gr.

Búskaparhlé.

Lögbýli heldur greiðslumarki sínu óskertu þótt réttur til beingreiðslna falli niður vegna búskaparhlés án þess að samið sé um búskaparlok og greiddar bætur fyrir. Tilkynna skal Matvælastofnun fyrir 15. janúar ár hvert ef framleiðandi óskar eftir að fá beingreiðslur aftur að loknu hléi. Beingreiðslur greiðast handhafa frá og með 1. janúar það ár.

5. gr.

Ásetningshlutfall.

Til að fá óskertar beingreiðslur á árinu 2015 þarf handhafi að eiga að lágmarki 0,70 vetrarfóðraðar kindur fyrir hvert ærgildi greiðslumarks.

Sjávarútvegs- og landbúnaðarráðherra skal að fengnum tillögum framkvæmdanefndar búvörusamninga auglýsa ásetningshlutfall skv. 3. mgr. 39. gr. búvörulaga fyrir 20. september ár hvert vegna næsta almanaksárs.

Nái ásetningur ekki því lágmarki skerðast beingreiðslur hlutfallslega. Ef greiðslumarki lögbylísins er skipt á fleiri en einn rekstraraðila, þá skal miðað við greiðslumark og ásetning hvers rekstraraðila fyrir sig.

6. gr.

Lækkun ásetningshlutfalls.

Ásetningshlutfall hjá framleiðendum sem hafa skorið niður fé til útrýmingar bótaskyldum sjúkdómum skal á fyrsta almanaksári eftir fjártöku aðeins nema 1/3 af því sem ákveðið er samkvæmt 5. gr. og á öðru ári 2/3, til að þeir haldi fullum beingreiðslum.

Um lækkun ásetningshlutfalls á lögbýlum þar sem búfjárbætur kemur í veg fyrir eðlilega framkvæmd uppgræðslu eða veldur of miklu álagi á beitiland fer skv. 3. mgr. 39. gr. búvörulaga.

7. gr.

Gjalddagar beingreiðslna.

Beingreiðslur greiðast með níu jöfnum mánaðarlegum greiðslum 1. hvers mánaðar frá janúar til september ár hvert, þó þannig að greiðsla fyrir janúar fer fram 1. febrúar ásamt greiðslu fyrir þann mánuð. Beingreiðslur taka árlegum breytingum í samræmi við verðlagsuppfærslu fjárlaga. Ef þróun meðaltalsvísitölu neysliverðs verður önnur en verðlagsforsendur fjárlaga á árinu, skal mismunurinn leiðréttur í fjárlögum næsta árs.

8. gr.

Skerðing eða niðurfelling beingreiðslna.

Matvælastofnun er heimilt að skerða eða fella niður beingreiðslur ef sauðfjárframleiðandi gefur rangar upplýsingar um ásettan fjölda sauðfjár eða stundar ólöglega sölu eða dreifingu á kjóti af heimaslátrúðu sauðfé eða brýtur á annan hátt reglur eða samningsbundin ákvæði um afsetningu afurða.

9. gr.

Fjármunir vegna skerðinga á beingreiðslum.

Beingreiðslum sem sparast vegna skerðingar ákvæða 5. og 8. gr. skal ráðstafað samkvæmt ákvörðun framkvæmdanefndar búvörusamninga.

10. gr.

Ráðstöfun fjármuna í búvöru- og búnaðarlagasamningi.

Fjármunum sem ráðstafað skal samkvæmt samningi um starfsskilyrði sauðfjárræktar frá 25. janúar 2007, með síðari breytingum og fjármunum samkvæmt samningi um verkefni samkvæmt búnaðarlögum nr. 70/1998, dags. 28. september 2012, skal ráðstafað með eftirfarandi hætti:

- a) Framlögum vegna ullarnýtingar skal ráðstafa samkvæmt verklagsreglum í viðauka I.
- b) Framlögum til jarðræktar og hreinsunar affallsskurða skal ráðstafa samkvæmt verklagsreglum í viðauka II. Um framkvæmd úttekta vegna framlaga til jarðræktar og hreinsunar affallsskurða, gilda verklagsreglur í viðauka III.
- c) Framlögum vegna úthlutunar bústofnskaupastyrkja til frumbýlinga skal ráðstafað í samræmi við verklagsreglur í viðauka IV.
- d) Framlögum vegna stuðnings við kennslu, rannsóknir, leiðbeiningar og þróun í sauðfjárrækt skal ráðstafað samkvæmt verklagsreglum í viðauka V.

11. gr.

Málskotsheimild.

Ákvörðun Matvælastofnunar um skráningu á greiðslumarki lögbýla og rétt til beinna greiðslna er heimilt að skjóta til úrskurðar sjávarútvegs- og landbúnaðarráðherra innan þriggja mánaða, sbr. VII. kafla stjórnsýslulaga nr. 37/1993.

12. gr.

Viðurlög.

Brot á reglugerð þessari varða viðurlögum samkvæmt lögum nr. 99/1993 um framleiðslu, verðlagningu og sölu á búvörum með síðari breytingum. Með mál út af brotum skal farið skv. lögum nr. 88/2008 um meðferð sakamála.

13. gr.

Gildistaka.

Reglugerð þessi er sett samkvæmt heimild í lögum nr. 99/1993 um framleiðslu, verðlagningu og sölu á búvörum, með síðari breytingum og búnaðarlögum nr. 70/1998, með síðari breytingum. Reglugerðin öðlast þegar gildi. Jafnframt er felld úr gildi reglugerð nr. 262/2014 um greiðslumark sauðfjár á lögbýlum 2014-2017 og auglýsingar nr. 993/2012, 707/2013, 708/2013, 703/2014 og 30/2014.

Atvinnuvega- og nýsköpunarráðuneytinu, 5. desember 2014.

F. h. sjávarútvegs- og landbúnaðarráðherra,

Ólafur Friðriksson.

Rebekka Hilmarsdóttir.

VIÐAUKI I

Verklagsreglur um ráðstöfun fjár vegna ullarnýtingar.

1. gr.

Reglur þessar fjalla um ráðstöfun fjármagns vegna nýtingar á ull. Við framkvæmd reglnanna skal leitast við að ná markmiðum samningsins um starfsskilyrði sauðfjárræktar frá 25. janúar 2007, með síðari breytingum.

Samkvæmt 4. gr. samningsins, greiðir ríkissjóður árlega framlög til ullarnýtingar á samnings- tímanum og hafa Bændasamtök Íslands umsjón með ráðstöfun fjárins.

2. gr.

Fjármunum til ullarnýtingar skal ráðstafað á eftirgreindan hátt:

1. Að minnsta kosti 84% skulu greiðast til þeirra bænda sem selja ull og eru jafnframt framleiðendur annarra sauðfjárafurða. Fjárhæðinni skal deilt niður hlutfallslega eftir gæðum á hvert kíló hreinnar ullar miðað við alla innlagða ull á tímabilinu 1. nóvember – 31. október samkvæmt verðskrá sem Bændasamtök Íslands útbúa. Skilyrði fyrir greiðslu fjármuna til bænda er að ullin hafi verið flokkuð og metin í samræmi við lög nr. 57/1990, um flokkun og mat á gærum og ull, og reglugerð nr. 856/2003, um ullarmat.
2. Allt að 15% skulu greiðast til kaupenda ullar sem uppfylla skilyrði skv. 3. gr. Fjárhæðin skal þó eigi vera hærrí en sem nemur kostnaði við söfnun ullarinnar. Gangi af fjárhæðinni verði mismunur færður á 1. tölul.
3. 1% greiðist til Bændasamtaka Íslands vegna umsýslukostnaðar og annars kostnaðar sem kann að falla til vegna framkvæmdarinnar.

Verði fjármunum skv. 1. og 3. tölul. ekki ráðstafað innan almanaksársins er Bændasamtökum Íslands heimilt að höfuðstólsfæra þá á milli ára.

3. gr.

Í september ár hvert auglýsa Bændasamtök Íslands, t.d. í Bændablaðinu, eftir umsækjendum um stuðning til söfnunar ullar, sbr. 2. tölul. 2. gr. Umsóknum skal skilað á skrifstofu Bændasamtaka Íslands á sérstökum eyðublöðum sem samtökin láta í té eigi síðar en tveimur vikum eftir birtingu auglýsingar.

Stuðningur til söfnunar ullar er háður því að umsækjandi uppfylli eftirfarandi skilyrði:

1. Aðili skal vera reiðubúinn að taka við allri vinnsluhæfni ull af öllum framleiðendum sem þess óska.
2. Aðili þarf að sækja ull heim til bænda eða taka á móti ullinni á móttökustöð sem ekki er lengra frá hverjum einstökum seljanda ullar en 100 km.
3. 30% allrar ullar sem aðili móttækur skal þvegin hér á landi og jafnframt unnið úr þessari sömu ull band, lopi eða samsvarandi vara hérlandis.

4. gr.

Ullarkaupendur sem þiggja stuðning til söfnunar ullar skulu skila Bændasamtökum Íslands upplýsingum um móttækna ull fyrir 5. hvers mánaðar. Upplýsingar skulu veittar um magn, flokka og þvott sundurliðaðar niður á hvern seljanda. Upplýsingarnar má veita með sendingu afreikninga eða sölunótna en ef upplýsingar eru sendar á rafrænu formi er ekki skylt að afreikningar eða sölunótur fylgi, aðeins að þessi gögn séu til staðar og aðgengileg, verði eftir þeim leitað. Þá skulu þeir skila Bændasamtökum Íslands ársskýrslu um ullarnýtingu fyrir 1. febrúar ár hvert, þ.m.t. um atriði sem talin eru upp í 1.-3. tölul. 2. mgr. 3. gr. þessara verklagsreglna.

5. gr.

Bændasamtök Íslands ráðstafa greiðslum til innleggjenda ullar samkvæmt þessum verklagsreglum. Til að bóndi hljóti greiðslur skv. 1. tölul. 2. gr. þurfa að liggja fyrir staðfestar upplýsingar frá aðila sem hlýtur stuðning til söfnunar um móttækna ull, sbr. 3.-4. gr.

Til að bóndi fái greiðslur fyrir innlagða ull sem hann selur til annarra en þeirra sem hljóta stuðning til söfnunar, sbr. 3.-4. gr., þarf hann að sjá til þess að upplýsingar, staðfestar af ullarkaupanda, um þau atriði sem koma fram í 4. gr. berist Bændasamtökum Íslands. Bóndi og ullarkaupandi geta samið um að hinn síðarnefndi skili upplýsingunum.

6. gr.

Bændasamtök Íslands skulu fyrir 1. mars ár hvert ljúka uppgjöri gagnvart þeim sem hljóta stuðning til söfnun ullar og seljendum ullar.

Bændasamtök Íslands skulu gera samning við þá ullarkaupendur sem hljóta stuðning til söfnunar ullar, sbr. 3.-4. gr. Í slíkum samningi skal ullarkaupandi skuldbinda sig til þess að uppfylla þau skilyrði sem fram koma í 1.-4. tölul. 1. mgr. 3. gr. sem og 4. gr.

7. gr.

Bændasamtök Íslands skulu árlega skila yfirliti til atvinnuvega- og nýsköpunarráðuneytis um heildarfjárhæðir greiddra framlaga samkvæmt reglum þessum, sbr. grein 6.3 í samningi um starfsskilyrði sauðfjárræktar. Fjárhæðir skulu sundurliðaðar eins og kostur er.

8. gr.

Verklagsreglur þessar eru settar samkvæmt grein 6.3 í samningi um starfsskilyrði sauðfjárræktar.

VIÐAUKI II

Verklagsreglur um ráðstöfun framlaga til jarðræktar og hreinsunar affallsskurða.

1. gr.

Reglur þessar fjalla um ráðstöfun fjármagns úr jarðræktarsjóði vegna jarðræktar og hreinsunar affallsskurða, skv. 5. gr. samnings frá 28. september 2012 um verkefni samkvæmt búnaðarlögum, nr. 70/1998 og framlög til þeirra á árunum 2013 til 2017, sbr. gr. 6.4 í samningi um starfsskilyrði mjólkurframleiðslu, frá 10. maí 2004, með síðari breytingum, og gr. 4.5 í samningi um starfsskilyrði sauðfjárræktar, frá 25. janúar 2007, með síðari breytingum.

Við framkvæmd þessara reglna skal leitast við að ná markmiðum ofangreindra samninga.

2. gr.

Ár hvert auglýsa Bændasamtök Íslands, t.d. í Bændablaðinu, eftir umsækjendum um framlög vegna jarðræktar og hreinsunar á affallsskurðum. Umsóknnum skal skilað á skrifstofu Bændasamtaka Íslands á sérstökum eyðublöðum sem samtökin láta í té, eða á rafrænu formi, eigi síðar en 10. september ár hvert vegna framkvæmda á árinu.

Í umsókn bús um framlög samkvæmt 3. gr. skulu koma fram upplýsingar um nafn, kennitölu og heimilisfang umsækjanda, búsnúmer og landnúmer jarðar sem ræktað er á. Jafnframt skal umsækjandi, ef óskað er eftir, leggja fram gögn um að hann hafi ÍSAT-númer í búnaðargjaldsskyldri búgrein og virðisaukaskattsnúmer.

Í umsókn aðila um framlög samkvæmt 4. gr. skulu koma fram upplýsingar um nafn, kennitölu og heimilisfang umsækjanda. Umsókn skal fylgja uppdráttur af framkvæmdasvæði og staðfesting eigenda lands á samþykki fyrir framkvæmdinni.

3. gr.

Framlög má veita til sáningar á ræktarlandi þar sem korn-, tún-, grænfóður- og oliujurtarækt er ætluð til fóður- og matvælaframleiðslu, beitar eða iðnaðar. Framlög má aðeins veita ef heildarflatarmál ræktunarinnar er a.m.k. 2 ha. Uppskera er kvöð.

Framlag á hvern ha fyrir hvert bú er kr. 17.000 á ha frá 1-30 ha og kr. 12.000 á ha frá 30-60 ha. Framangreind stærðarmörk eru 2,5 sinnum hærrí á svínabúum. Greitt er út á heila ha og venjulegar reglur um upphækkunar gilda. Framlög skerðast á hvern ha hlutfallslega ef fjármunir hrökkva ekki til. Ef afgangur verður deilist hann jafnt á alla ræktaða ha.

4. gr.

Þá má veita framlög til hreinsunar affallsskurða. Framlög má veita til upphreinsunar á stórum affallsskurðum sem taka við vatni af stóru vatnasvæði. Skilyrði er að skurðirnir séu hreinsaðir bakka á milli og séu minnst 6 m breiðir að ofan.

Framlag á hvern kílómetra er kr. 125.000. Greitt er út á hundruð metra og venjulegar reglur um upphækkunar gilda. Framlög má aðeins veita ef heildarlengd er a.m.k. 100 metrar.

Á hverju ári skulu allt að kr. 10.000.000 renna til hreinsunar affallsskurða. Framlög skerðast á hvern kílómetra hlutfallslega ef fjármunir hrökkva ekki til. Ef afgangur verður skal hann ekki deilast út.

5. gr.

Bændasamtök Íslands annast úthlutun framlaga samkvæmt þessum reglum.

6. gr.

Umsækjendur um framlög samkvæmt 3. gr. geta verið bú, þ.e. rekstrareiningar þar sem búnaðargjaldsskyld starfsemi er stunduð og hafa sérstakt virðisaukaskattsnúmer.

Með svínabúi, sbr. 2. mgr. 3. gr. þessara reglna, er átt við bú þar sem stunduð er starfsleyfis-skyld ræktun, eldi eða sala á svinum, haldnar eru að jafnaði a.m.k. 10 fengnar eða mjólkandi gyltur ásamt grísum eða þar sem er sambærileg ræktun eða eldi að mati ráðunauts, og þar sem uppskera ræktunar sem framlög fást til er til notkunar á viðkomandi búi.

Umsækjendur um framlög samkvæmt 4. gr. geta verið bú, sbr. 1. mgr., búnaðarfélög, sveitarfélög, ræktunarsambönd o.fl.

7. gr.

Skilyrði þess að verkefni njóti framlags er að fram hafi farið úttekt. Um úttektina gilda verklagsreglur í viðauka III. Til að standast úttekt þarf m.a. að liggja fyrir viðurkennt tunkort af ræktarlandinu, t.d. úr tunkortagrunni Bændasamtaka Íslands.

Úttektir á framkvæmdum skulu berast Bændasamtökum Íslands fyrir 15. nóvember á sama ári eftir að umsókn berst og skulu styrkir greiddir fyrir árslok.

8. gr.

Bændasamtök Íslands skulu árlega skila yfirliti til atvinnuvega- og nýsköpunarráðuneytis um heildarfjárhæðir greiddra framlaga samkvæmt reglum þessum þar sem koma fram sundurliðaðar upplýsingar um viðtakendur, fjárhæðir og verkefni, skv. 3. mgr. 9. gr. samnings um verkefni samkvæmt búnaðarlögum, nr. 70/1998, og framlög til þeirra á árunum 2013 til 2017, dags. 28. september 2012, sbr. grein 6.3 samnings um starfsskilyrði sauðfjárræktar, frá 25. janúar 2007, með síðari breytingum.

9. gr.

Verklagsreglur þessar eru settar skv. 5. gr. samnings frá 28. september 2012, um verkefni samkvæmt búnaðarlögum, nr. 70/1998, og framlög til þeirra á árunum 2013 til 2017, sbr. gr. 6.3 í samningi um starfsskilyrði sauðfjárræktar, frá 25. janúar 2007, með síðari breytingum, og gr. 6.4 í samningi um starfsskilyrði mjólkurframleiðslu, frá 10. maí 2004, með síðari breytingum.

VIÐAUKI III

Verklagsreglur um framkvæmd úttekta vegna framlaga til jarðræktar og hreinsunar affallsskurða.

1. gr.

Reglur þessar fjalla um framkvæmd úttekta vegna framlaga til jarðræktar og hreinsunar affallsskurða, skv. 5. gr. samnings frá 28. september 2012, um verkefni samkvæmt búnaðarlögum, nr. 70/1998 og framlög til þeirra á árunum 2013 til 2017.

Um framlögin sem slík gilda reglur um framlög til jarðræktar og hreinsunar affallsskurða.

Við framkvæmd þessara reglna skal leitast við að ná markmiðum ofangreindra samninga.

2. gr.

Til að standast úttekt vegna jarðræktar þarf að liggja fyrir fullnægjandi túnkort af ræktarlandinu, t.d. úr túnkortagrunni Bændasamtaka Íslands. Túnkortið á að sýna það land sem er grundvöllur að styrkumsókn. Vanda skal til verka þegar ræktunarspildurnar eru hnitaðar inn í þar til gerðan kortagrunn. Kortið skal teiknað í að lágmarki mælikvarðanum 1:3000. Þegar ræktað er aðeins í hluta af túni sem hægt er að vísa í á túnkorti og/eða þegar um nýbrotið land er að ræða sem ekki er til mælt á túnkorti, ber umsækjanda að framvísa fullnægjandi túnkorti sem afmarkar ræktunina.

Þegar metið er hvort túnkort er fullnægjandi skal byggja það mat á því hvort fagaðili hafi teiknað og mælt viðkomandi ræktun. Fullnægjandi túnkort er t.d. ekki loftmynd, með áteiknuðum (óprentuðum) útlínum án útreiknaðrar stærðar. Berist umsókn með ófullnægjandi túnkorti skal úttektaraðili upplýsa umsækjanda um það eins skjótt og kostur er og benda viðkomandi á hvar hann getur aflað fullnægjandi túnkorts.

Úttektaraðili sannreynir stærð ræktunar og hvort skilyrði til styrkveitingar eru að öðru leyti uppfyllt. Heimilt er að vettvangsúttekt á ræktarlandi fari einungis fram með tilviljunarkenndu úrtaki, óháð umfangi ræktunar. Uppskera er kvöð.

Styrkhæf ræktun er ræktun grass, korntegunda til dýrafóðurs og manneldis, ræktun olíujurta, þar með talin til lífðiselolíuframleiðslu enda sé hratið nýtt til fóðurs, ræktun grænófóðurs til beitar og uppskeru á því ári sem uppskorið er. Beit búpenings telst vera uppskera sem og nýting kornhálms. Ræktun vetraryrkja sem sáð er um mitt sumar og endurræktun túna er tekin út á uppskeruári. Óstyrkhæf ræktun er kornrækt sem eingöngu er ætluð til að draga að gæsir til skotveiði og önnur ræktun sem ekki er nytjuð til búskapar, þar með talin sáning í golfvelli, tjaldstæði o.s.frv.

3. gr.

Til að standast úttekt vegna hreinsunar affallsskurða þarf að liggja fyrir fullnægjandi kort yfir skurði sem sótt er um styrk til að hreinsa. Kortið skal sýna þá skurði sem eru grundvöllur að styrkumsókn. Vanda skal til verka þegar skurðirnir eru hnitaðir inn í þar til gerðan kortagrunn. Kortið skal sýna með fullnægjandi hætti lengd og breidd skurðanna. Greitt er út á hundruð metra og venjulegar

reglur um upphækkanir gilda. Framlög má aðeins veita ef heildarlengd er a.m.k. 100 metrar. Breidd skurðanna skal minnst vera 6 metrar að ofan.

Úttektaraðili sannreynir stærð, lengd og breidd skurðar og hvort skilyrði til styrkveitingar eru að öðru leyti uppfyllt. Heimilt er að vettvangsúttekt á skurðum fari einungis fram með tilviljunarkenndu úrtaki, óháð umfangi.

4. gr.

Ár hvert auglýsa Bændasamtök Íslands, t.d. í Bændablaðinu, eftir umsækjendum um framlög vegna jarðræktar og hreinsunar á affallsskurðum. Umsóknum skal skilað á skrifstofu Bændasamtaka Íslands á sérstökum eyðublöðum sem samtökin láta í té, eða á rafrænu formi, eigi síðar en 10. september ár hvert vegna framkvæmda á árinu.

Allar umsóknir og úttektir skulu skráðar í þar til gerðan gagnagrunn. Einnig skulu allar úttektir skráðar og hnitsettar í túnkortagrunn Bændasamtaka Íslands. Skrá skal upplýsingar um ræktunina eins nákvæmlega og unnt er, m.a. tegundir og yrki, ræktunarár, landnúmer þess lands þar sem ræktunin á sér stað og búsnúmer umsækjandans.

Úttektaraðili skal vera starfsmaður búnaðarsambands eða leiðbeiningarmiðstöðvar sem hefur almenna þekkingu á viðkomandi sviði. Sá má ekki gera úttektir á jarðrækt eða skurðum sem hefur leiðbeint um ræktun eða hreinsun skurðanna.

5. gr.

Úttektum skal að jafnaði vera lokið fyrir 15. nóvember ár hvert. Úttektir á framkvæmdum skulu berast Bændasamtökum Íslands fyrir 15. nóvember á sama ári eftir að umsókn berst og skulu styrkir greiddir fyrir árslok.

6. gr.

Verklagsreglur þessar eru settar skv. 6. gr. samnings frá 28. september 2012 um verkefni samkvæmt búnaðarlögum, nr. 70/1998, og framlög til þeirra á árunum 2013 til 2017.

VIÐAUKI IV

Verklagsreglur um úthlutun bústofnskaupastyrkja til frumbýlinga.

1. gr.

Samkvæmt samningi um starfsskilyrði sauðfjárræktar frá 25. janúar 2007, með síðari breytingum, skal árlega verja fjármunum til nýliðunar í stétt sauðfjárbænda, í formi styrkja til bústofnskaupa, bæði til frumbýlinga og við ættliðaskipti á bújörðum. Fjármunirnir eru hluti af liðnum „Nýliðunar- og átaksverkefni“ í samningnum og miðast við 43,75% af fjárhæð hans eins og hún er hverju sinni.

Framlög in beinast að einstaklingum, þannig getur sami aðili aðeins notið framlags einu sinni, í eigin nafni eða til lögaðila sem hann á að meirihluta og rekur. Þó er heimilt að skipta framlaginu á allt að fimm ár í röð ef bústofnskaup fara fram á þeim tíma og/eða skilyrði 4. gr. eru uppfyllt. Hjón og sambýlisfólk teljast einn einstaklingur í skilningi þessara reglna.

Markmið bústofnskaupastyrkja eru m.a. að stuðla að nýliðun í hópi sauðfjárbænda, styrkja búsetu í dreifbýli og efla sauðfjárrækt sem atvinnugrein.

2. gr.

Framlög eru veitt til nýliða í sauðfjárbúskap. Þeir einstaklingar sem eitt eða fleiri neðangreindra skilyrða gilda um teljast ekki til nýliða. Skilyrðin í liðum a, b og c miðast við tímabil átta ár aftur í tímann talið frá 1. janúar árið áður en umsókn er lögð fram í fyrsta sinn:

- a) Hafa verið skráðir handhafar beingreiðslna.
- b) Hafa verið eigendur að félagsbúum, einkahlutafélögum eða öðru fyrirtækjaformi sem rekið hefur sauðfjárbú.
- c) Hafa átt fleiri en 50 fjár samkvæmt forðagæsluskýrslum.

3. gr.

Framlög eru veitt til bústofnskaupa og miðast við kaup á sauðfé umfram 50 fjár. Umsókn um framlag skal skila inn til Bændasamtaka Íslands fyrir 1. mars ár hvert, eftir auglýsingu þar um. Bændasamtökunum er heimilt að auglýsa á sambærilegan hátt eftir umsóknum allt að tvisvar í viðbót ár hvert. Með umsókn skal framvísa gögnum sem sýna fram á að kaup á bústofni hafi sannanlega átt sér stað. Viðmiðunarupphæð framlags er 5.000 kr. á kind, en framlag má þó aldrei verða hærra en kaupverð. Heimilt er að hækka framlag á kind, ef fjárhæðin sem til ráðstöfunar er, gengur ekki út.

4. gr.

Þeir sem fengið hafa úthlutað styrk skv. 3. gr. og sækja um aftur skv. 1. gr. geta sótt um sambærilegan styrk vegna fjölgunar í eigin bústofni. Eingöngu er þá heimilt að veita styrk út á þá fjölgun vetrarfóðraðra kinda sem umsækjandi sýnir fram á að hafi orðið vegna ásetnings úr eigin fjárstofni.

5. gr.

Bændasamtök Íslands annast afgreiðslu umsókna og stjórn samtakanna tekur ákvörðun um úthlutun framlaga. Fullnægi umsókn öllum skilyrðum skal fyrst úthluta fullum framlögum til kaupa á fyrstu 500 kindunum skv. hverri umsókn. Ekki er þó greitt framlag vegna fyrstu 50 kindanna í hverjum kaupum, nema þegar framlaginu er skipt skv. 1. gr. Að því loknu skal úthluta sömu framlögum til kaupa á kindum umfram 500, eftir því sem fjárveitingar leyfa.

Bændasamtökum Íslands er heimilt að afla upplýsinga um umsækjanda úr afurðakerfi, skrár yfir greiðslumarkshafa og aðild að gæðastýringu. Þá er Bændasamtökunum einnig heimilt að kalla eftir upplýsingum um aðild að framleiðslu sauðfjárafurða frá afurðastöðvum að fengnu samþykki umsækjanda. Þá er Bændasamtökunum heimilt að krefja umsækjanda um önnur þau gögn sem talin eru nauðsynleg vegna afgreiðslu umsóknarinnar. Heimild Bændasamtakanna til þess að afla gagna gildir út samningstímann, sbr. 6. gr.

6. gr.

Gerður verður samningur til fimm ára um nýliðunarframlag. Þar skal koma fram að framlagið fyrnist á fimm árum. Láti handhafi að framlagi af búskap og/eða uppfyllir ekki lengur skilyrði, sbr. 7. gr. á samningstímanum skal semja um hlutfallsleg skil á eftirstöðvum.

7. gr.

Áður en framlag kemur til greiðslu skal umsækjandi sýna fram á að hann eigi eða leigi rekstur á lögbyli og eigi lögheimili þar. Jafnframt skal umsækjandi leggja fram gögn um að hann hafi ÍSAT númer í búnaðargjaldsskyldri búgrein, virðisaukaskattsnúmer sem og gögn um að hann sé aðili að eða hafi sótt um aðild að gæðastýringu í sauðfjárrækt. Stjórn Bændasamtaka Íslands er heimilt að víkja frá skilyrði um lögheimili ef sérstakar ástæður mæla með því.

8. gr.

Komi í ljós að fjárveitingar dugi ekki til að veita full framlög til allra sem á þeim eiga rétt skv. reglum þessum skal fyrst skerða hlutfallslega framlög til kaupa á kindum umfram 500, sbr. 4. gr. Nægi það ekki skal skerða önnur framlög á sama hátt. Ef ekki tekst að úthluta öllu því fjármagni sem er til ráðstöfunar, er heimilt að bæta upp skerðingar, sbr. 1. mgr., allt að tvö ár aftur í tímann.

9. gr.

Þeir sem uppfylla skilyrði reglna þessara geta sótt um framlag skv. þeim vegna bústofnskaupa sem fram hafa farið allt aftur til 1. janúar árinu áður en umsókn er lögð fram. Jafnframt geta þeir sem fengið hafa styrki allt að fjórum sinnum áður, sótt um viðbótarframlag skv. 1. og 4. gr.

10. gr.

Verklagsreglur þessar eru settar samkvæmt grein 6.3 í samningi um starfsskilyrði sauðfjárræktar frá 25. janúar 2007 með síðari breytingum.

VIÐAUKI V

Verklagsreglur vegna stuðnings við kennslu, rannsóknir, leiðbeiningar og þróun í sauðfjárrækt.

1. gr.

Reglur þessar fjalla um ráðstöfun fjármuna samkvæmt grein 4.5 í samningi um starfsskilyrði sauðfjárræktar 2008-2017, frá 25. janúar 2007 með síðari breytingum, skal veita fjármunum árlega á gildistíma samningsins til að styðja kennslu, rannsóknir, leiðbeiningar og þróun í greininni t.d. vegna gæðastýringar og lífrænnar framleiðslu. Fjármunirnir eru hluti af liðnum „Nýliðunar- og átaksverkefni“ í samningnum og miðast við 37,5% af fjárhæð hans eins og hún er hverju sinni.

2. gr.

Framleiðnisjóður landbúnaðarins annast vörslu umræddra fjármuna, auglýsir eftir umsóknum og úthlutar styrkjum samkvæmt reglum þessum. Frestur til að skila inn umsóknum rennur út 1. apríl og 1. október, ef auglýst er aftur á sama ári. Umsóknir um styrki skal senda til Framleiðnisjóðs landbúnaðarins á eyðublöðum sem hann lætur í té. Framleiðnisjóður landbúnaðarins úthlutar styrkjum eftir umsóknum eða á grundvelli tillagna fagráðs í sauðfjárrækt.

3. gr.

Framleiðnisjóður landbúnaðarins skal leita umsagnar fagráðs í sauðfjárrækt um allar umsóknir sem sjóðnum berast og varða úthlutun samkvæmt reglum þessum.

Fagrád í sauðfjárrækt leggur faglegt mat á umsóknir um styrkveitingar. Styrkhæf eru hver þau verkefni sem talin eru styrkja íslenska sauðfjárrækt og falla undir það að vera kennsla, rannsóknir, leiðbeiningar og/eða þróun í sauðfjárrækt.

Framleiðnisjóði landbúnaðarins er óheimilt að afgreiða umsókn ef umsögn fagráðs liggur ekki fyrir. Meðmæli fagráðs er forsenda styrkveitingar.

Framleiðnisjóði landbúnaðarins er heimilt að leita umsagna fagráðs í sauðfjárrækt um önnur erindi er varða sauðfjárrækt sem sjóðnum berast.

4. gr.

Styrkþegar geta verið einstaklingar, rannsóknarhópar, háskólar, rannsóknarstofnanir og fyrirtæki. Umsóknum skal skila til Framleiðnisjóðs landbúnaðarins á sérstökum eyðublöðum sem sjóðurinn lætur í té.

Umsókn skal fylgja eftirfarandi:

- a. Listi yfir alla sem aðild eiga að verkefninu.
- b. Yfirlit um tilgang og markmið verkefnis þ.m.t. rökstuðningur fyrir því hvernig það fellur að þeim markmiðum sem tilgreind eru í 2. mgr. 3. gr. og hvernig það gagnast íslenskri sauðfjárrækt að öðru leyti.
- c. Tímaáætlun verkefnisins og upplýsingar um helstu áfanga þess.
- d. Fjárhagsáætlun verkefnisins í heild.
- e. Upplýsingar um hvernig niðurstöður verkefnisins verða kynntar.

5. gr.

Áður en styrkur er greiddur skal umsækjandi staðfesta að fjármögnun verkefnisins í heild hafi verið tryggð, sbr. d-lið 4. gr.

Greiða má allt að 40% af samþykktum styrk til styrkþega þegar verkefni er sannarlega hafið. 20% af styrk má svo greiða þegar áfangaskýrslu hefur verið skilað sem gefur til kynna að framvinda verkefnisins sé a.m.k. 60% af heildarverkefninu. Eftirstöðvar framlagsins 40%, má þá greiða þegar

lokaskýrslu hefur verið skilað og hún samþykkt í fagráði í sauðfjárrækt. Framleiðnisjóði landbúnaðarins er þó heimilt að víkja frá þessu ef eðli verkefnisins krefst þess.

6. gr.

Styrkþegar skulu skila skýrslu um verkefnið til fagráðs í sauðfjárrækt eigi síðar en 6 mánuðum eftir að því lýkur. Sé verkefnið til lengri tíma en eins árs skal skila árlegri áfangaskýrslu. Í skýrslunni skal lagt mat á framgang verkefnisins og hverju það hafi skilað fyrir sauðfjárræktina í heild.

Framleiðnisjóði landbúnaðarins er heimilt að leita umsagna fagráðs í sauðfjárrækt um verkefnaskýrslur sem styrkþegum er gert að skila til sjóðsins. Allar lokaskýrslur skulu kynntar fagráði í sauðfjárrækt.

7. gr.

Styrkveitingar til verkefna þar sem ekki tekst að uppfylla skilyrði þessara reglna um skýrsluskil og lok verkefnis, sbr. 6.-7. gr., innan 12 mánaða frá því að Framleiðnisjóður landbúnaðarins samþykkir fyrirheit um styrk, falla niður.

8. gr.

Verklagsreglur þessar eru settar samkvæmt grein 6.3 í samningi um starfsskilyrði sauðfjárræktar frá 25. janúar 2007, með síðari breytingum.